



Br: *7/A-904/26-3547*

30. jun 2026.

PLATFORMA

za učešće potpredsjednika Vlade za međunarodne odnose i ministra vanjskih poslova mr Ervina Ibrahimovića na sastanku ministara vanjskih poslova Grupe prijatelja Zapadnog Balkana i ministara vanjskih poslova država Zapadnog Balkana, Rim, Republika Italija, 10. jula 2026. godine

I UVOD

Potpredsjednik Vlade za međunarodne odnose i ministar vanjskih poslova mr Ervin Ibrahimović, na poziv potpredsjednika Vlade i ministra vanjskih poslova i međunarodne saradnje Republike Italije Antonija Tajanija, učestvovalaće na sastanku ministara vanjskih poslova Grupe prijatelja Zapadnog Balkana i ministara vanjskih poslova država Zapadnog Balkana, koji će se održati u Rimu, Republika Italija, 10. jula 2026. godine. Pored ministara vanjskih poslova država Grupe prijatelja i Zapadnog Balkana, na sastanku će učestvovati i visoka predstavica za vanjske poslove i bezbjednosnu politiku Kaja Kalas, komesarka za proširenje Marta Kos i i predsjednica Evropskog parlamenta Roberta Metsola, kao i drugi visoki predstavnici institucija Evropske unije i međunarodnih organizacija.

Tokom prethodne dvije godine, sastanci Grupe prijatelja Zapadnog Balkana i ministara vanjskih poslova država Zapadnog Balkana bili su fokusirani na uključivanje postepene integracije u politiku proširenja EU, kroz unapređivanje saradnje u oblasti zajedničkih vanjskih i bezbjednosnih izazova i implementiranje Instrumenta za reformu i rast za Zapadni Balkan.

Sastanak se organizuje sa ciljem razmatranja budućih zajedničkih ciljeva i operativnih predloga za podršku i ubrzanje evropske integracije država Zapadnog Balkana, a nakon što je prvobitno planirani sastanak ministara vanjskih poslova Grupe prijatelja Zapadnog Balkana i ministara vanjskih poslova država Zapadnog Balkana, planiran za 3. mart u Rimu, otkazan od strane domaćina zbog pogoršane bezbjednosne situacije na Bliskom istoku.

Potpredsjednik Vlade za međunarodne odnose i ministar vanjskih poslova mr Ervin Ibrahimović će imati izlaganje u okviru dvije sesije radnog dijela sastanka. U okviru prve sesije, posvećene oblikovanju budućih pristupnih ugovora i unapređenju procesa proširenja Evropske unije, ministar Ibrahimović će, zajedno sa ministrima vanjskih poslova država Zapadnog Balkana, učestvovati u razmjeni mišljenja o budućnosti politike proširenja, mogućim modalitetima pristupnog procesa i daljem približavanju regiona Evropskoj uniji. Tokom druge sesije, posvećene jačanju evropske strateške autonomije kroz unapređenje prehrambene sigurnosti, otpornosti lanaca snabdijevanja i saobraćajne povezanosti, ministar će učestvovati u diskusiji o mogućnostima snažnijeg uključivanja država Zapadnog Balkana u zajedničke evropske inicijative u ovim oblastima.

II ZNAČAJ UČEŠĆA

Učešće potpredsjednika Vlade i ministra vanjskih poslova Crne Gore mr Ervina Ibrahimovića na sastanku ministara vanjskih poslova Grupe prijatelja Zapadnog Balkana i ministara vanjskih poslova država Zapadnog Balkana predstavlja značajnu priliku da Crna Gora, kao

najnaprednija država kandidat za članstvo u Evropskoj uniji, reafirmiše svoju posvećenost evropskim vrijednostima, politici proširenja i nastavku sveobuhvatnog reformskog procesa.

U tom smislu, sastanak je prilika da se Crna Gora snažnije pozicionira kao kredibilan i konstruktivan partner u regionu, promoviše svoje prioritete i predstavi ostvarene rezultate u procesu evropske integracije, te ukaže na očekivanja u pogledu daljeg odvijanja pristupnih pregovora.

Sastanak će, pored jačanja međunarodnog ugleda Crne Gore, dodatno doprinijeti jačanju političkog dijaloga sa državama članicama Grupe prijatelja Zapadnog Balkana, institucijama Evropske unije i partnerima iz regiona, kao i obezbjeđivanju kontinuirane političke podrške daljem napretku Crne Gore u procesu pristupanja Evropskoj uniji.

III SASTAV DELEGACIJE

Delegaciju Crne Gore na sastanku ministara vanjskih poslova Grupe prijatelja Zapadnog Balkana i ministara vanjskih poslova država Zapadnog Balkana, u Rimu, Republika Italija, 10. jula 2026. godine, koju će predvoditi potpredsjednik Vlade za međunarodne odnose i ministar vanjskih poslova mr Ervin Ibrahimović činiće:

1. Aleksandar Drljević, otpravnik poslova a.i. u Ambasadi Crne Gore u Republici Italiji;
2. Ivan Ivanišević, v.d. generalnog direktora Direktorata za Evropsku uniju;
3. Perko Mijatović, šef Biroa za odnose sa javnošću u Ministarstvu vanjskih poslova;
4. Dejana Backović, savjetnica u Generalnom direktoratu za međunarodno-pravne poslove u Ministarstvu vanjskih poslova.

PREDLOG ZAKLJUČAKA

Vlada Crne Gore je, na sjednici od _____ 2026, razmotrila i usvojila Predlog platforme za učešće potpredsjednika Vlade za međunarodne odnose i ministra vanjskih poslova mr Ervina Ibrahimovića na sastanku ministara vanjskih poslova Grupe prijatelja Zapadnog Balkana i ministara vanjskih poslova država Zapadnog Balkana, Rim, Republika Italija, 10. jula 2026. godine.

Vlada je za članove delegacije, koju će predvoditi potpredsjednik Vlade Crne Gore za međunarodne odnose i ministar vanjskih poslova mr Ervin Ibrahimović, odredila:

1. Aleksandra Drljevića, otpravnika poslova a.i. u Ambasadi Crne Gore u Republici Italiji;
2. Ivana Ivaniševića, v.d. generalnog direktora Direktorata za Evropsku uniju;
3. Perka Mijatovića, šefa Biroa za odnose sa javnošću u Ministarstvu vanjskih poslova;
4. Dejanu Backović, savjetnicu u Generalnom direktoratu za međunarodno-pravne poslove u Ministarstvu vanjskih poslova.

Troškove učešća crnogorske delegacije na sastanku u Rimu snosi Ministarstvo vanjskih poslova.

Zadužuje se Ministarstvo vanjskih poslova da o navedenom učešću pripremi i Vladi dostavi izvještaj.